

唐紹儀傳

夏敬觀

唐紹儀。字少川。廣東中山縣人。清同治末留學美國。歸國後。以諳外交與伍廷芳齊名。紹儀初游朝鮮。值袁世凱充商務督辦兼理交涉事宜。一見契合。及朝鮮增置使館。被薦爲書記官。調仁川領事。世凱任直隸總督。以道員授津海關道。督辦滬寧津浦鐵路。副鐵良督辦稅務。官制改。補郵傳部左侍郎。兼署外務部右侍郎。其在郵傳部。以引用陳昭常施肇基爲丞參。致招物議。與尙書張百熙不洽。經翰林院侍讀馬吉樟糾參。明年。奉天改設行省。遂出爲巡撫。美國減收賠款。賞尙書銜。派充致謝專使。旋升授郵傳部尙書。辛亥革命軍起。詔起世凱爲內閣總理。紹儀解郵傳部大臣任。被派與民軍議和。初。清廷派遣留學。未重視。所得人才。率不過工於語言文字。以棄置不進用。輒屈爲西商通譯。紹儀留美久。特嫺習國際情勢。賴世凱援引。一躍而位登卿貳。私恩最深。宣統初。世凱被放逐。然封圻軍帥。多其特納。權勢布天下。故民軍亦利用其篡國之謀。但期姑定國體。紹儀南下。卽以恫疑虛喝。電請清廷召集臨時國會。以君主民主付之公決。世凱亦不惜權假民軍聲勢。虛詞牽就。清帝遜位。奠都南北之爭亦息。世凱遂繼任臨時總統。紹儀亦用游說功。充臨時內閣總理。先是參議院議決各省都督由省議會公舉。直隸都督民軍意屬王芝祥。世凱佯許之。心不謂然。嗾直省五路軍通電拒絕。世凱因謂疆圻重寄。匪可以之酬庸。物情未協。大非所宜。而別授以陸軍上將。派赴南京遣散軍隊。紹儀爭之不得。不副署。而委狀遽下。所組閣員。非盡由己。臨事亦掣肘。所處進退維谷。乃毅然罷去。世凱不復招之。遂亦絕。西南組合護法軍政府。設七總裁。行合議制。紹儀亦其一。八年。代表與北政府議和不諧。乃於故里築共樂園。決意退休。未幾爲汪兆銘所動。復出任中央黨部執行委員。兼中山模範縣長。不意縣民飛語攻訐。警隊譁變。幾危。以身走免。紹儀自負策略。志意甚壯。飲饌豪侈。尊俎之間。覩者變色。自是亦氣索頽放。日寇內侵。誘中國負名望者。

別立政府。紹儀適居滬。倂與寇議未協。終未肯出。然徘徊不去。竟爲其故交子弟以利斧斫斃。

湯壽潛傳 劉錦藻

宋慈襄

湯壽潛。號塾先。浙江山陰人。父沛恩。以經授徒鄉里。有隱德。子三。壽潛居長。早歲爲諸生。以文學見稱。宏敏有器識。既舉於鄉。客山東巡撫張曜幕。與烏程施補華同見倚任。於是習聞國政之得失。喟然論列時敝損益所宜。爲危言四十篇。期可見諸施行。時人以比唐甄潛書。馮桂芬抗議焉。光緒十六年。成進士。改庶常。散館。以知縣銓授安徽青陽知縣。當時浙人在皖者桐廬袁昶爲蕪湖道。黃巖王詠霓爲鳳陽守。皆有名。而壽潛與相埒。注意文教荒政。以清廉自持。然未久以親老乞歸。二十六年義和團之變。壽潛往說兩江總督劉坤一。兩湖總督張之洞。定東南互保之約。所全者甚大。二十九年。擢署兩淮鹽運使。又以親老辭。三十年。浙江全省人士倡築滬杭鐵路。公舉壽潛爲總理。吳興劉錦藻副之。次年。由商部奏派就職。加四品京堂銜。先是數載。外務部與英國銀公司訂借款築浙路合同。御史朱錫恩學士朱福誥先後抗疏力爭。至是壽潛錦藻亦博采輿論。堅拒外債。自集贊興工。函電紛馳。心力交瘁。部臣出爲調停。分築路借款爲二事。浙路數百餘里。卒以商款告成。行旅頌之。未幾。以爭廢英人借款草約。忤郵傳部尙書盛宣懷。宣統元年。授雲南按察使。實以遠之也。壽潛累辭不允。請人對。力陳在下之義。苟得達民隱。裨吏治。不必以一官自效。攝政王使盡所欲言。因頓首曰。願朝廷勿再用袁世凱。王嘿然。退草封事萬言。大旨在通上下之志。弭亂於未形。既入。不報。改授江西提學使。壽潛以言不見采。仍辭不赴官。復痛劾盛宣懷媚外誤國。使朝廷失信於民。不可使久處朝列。觸樞臣怒。奉旨革職。不許干涉路事。而壽潛之孚於民望者益深。三年八月。武昌光復。浙江響應。發難者集議推壽潛爲都督。迎之於上海。九月十五日起義。駐防杭州。清軍初猶負隅。壽潛